

PAGTULON-AN 15 – ANG MAHIMAYAON NGA GINGHARIAN NI SOLOMON

1 Hari 1 – 11 ug 2 Cronicas 1 - 9

TEMA: Sa paghatag ug panglantaw sa usa ka libo (1,000) katuig nga Gingharian.

Ingon nga bata, nakadula na ba ka ingon nga hari ug reyna? Kon nakadula ka na, tingali makalingaw sa dihang nagsul-ob ka sa korona sa imong ulo ug nagpakaaron-ingnon nga ang mga tawo mubuhat sa tanang nimong isulti kanila. Nahibalo ka ba nga ang mga magtotoo, sa umaabut nga panahon, magahari kauban ni Cristo sa kahimtang nga labaw pa sa usa ka hari or reyna dinhi sa kalibutan? Sa 2 Timoteo 2:11-12, atong mabasa nga ang magtotoo kang Cristo, nga magatinguha sa pagkinabuhi nga diosnon diha kang Cristo Jesus ug mag aantus (2 Timoteo 3:12), magahari kauban ni Cristo.

Si Haring David adunay tinguha sa pagtukod ug balay para sa arka sa pakigsaad ni Jehova. Apan ang pulong ni Jehova miabut kaniya nga nagaingon, "...dili ka magabuhat ug balay sa Akong ngalan tungod kay nagpaagas ka ug daghang dugo dinhi sa kalibutan sa atubangan Ko. Tan-awa, usa ka batang lalaki matawo alang kanimo, ...siya ang magabuhat sa balay alang sa Akong ngalan, ug siya mahimong Akong anak ug Ako mahimong iyang amahan, ug lig-unon ko ang ang trono sa iyang gingharian ibabaw sa Israel sa walay katapusan," 1 Cronicas 22:6-10. Busa gitawag ni David ang iyang anak nga si Solomon ug gisugo siya sa pagtukod sa balay. Karon sa pagkatigulang na ni David, iyang gihimo si Solomon iyang anak nga hari ibabaw sa Israel, 1 Cronicas 23:1.

Si Solomon misugod sa pagahari sa ibabaw sa Israel. Miadto siya sa hataas nga dapit didto sa Gibeon, kay didto ang tigumanan sa Dios nga gihimo ni Moises, ang alagad sa Dios didto sa kamingawan. Didto naghalad siya ug linibo nga mga halad-sinunog sa tumbaga nga halaran. Sa pagkagabii na, ang Dios nagpakita kang Solomon ug miingon kaniya, "Pangayo sa bisan unsa nga akong ihatag kanimo." Si Solomon nangayo nga hatagan siya sa Dios ug kaalam ug kahibalo. Tungod niining mapaubsanon nga hangyo, ang Dios mihatag usab kaniya ug kadagaya, mga bahandi ug dungog. Unya si Solomon mibalik sa Jerusalem ug nagahari ibabaw sa Israel, 2 Cronicas 1:1-13. Iyang gipakita ang kaalam sa paghusay sa panagbingkil sa duha (2) ka mga babaye, nga nag-ilogay sa pag-angkon nga sila ang tinuod nga inahan sa bata. Atong mabasa kini nga kasaysayan didto sa 1 Hari 3:16-28.

Gihan-ay ug gipahaluna ni Solomon ang iyang gingharian. Aduna siyaykwarenta ka libo (40,000) ka balay sa iyang mga kabayo, ug dose ka libo (12,000) ka mga tawo nga mangabayo. Siya usab misulti ug tulo ka libo (3,000) ka mga pasumbingay ug usa ka libo ug lima (1,005) ka mga alawiton, 1 Hari 4:26, 32. Ang iyang dakung trono hinimo sa garing ug gipanauran kini ug lunsay nga bulawan, ug ang tanan niya nga mga kopa nga imnanan binuhat sa bulawan. Siya nahimo nga bantugan labaw sa tanang mga hari sa kalibutan sa kadatu ug sa kaalam, 1 Hari 10:18, 21, 23.

Sa 2 Cronicas 3, atong mabasa nga si Solomon misugod sa pagbuhat sa Templo didto sa Bukid sa Moriah; diin si Jehova nagtubag sa mga halad sa iyang amahan nga si David, 1 Cronicas 21:26. Sa 1 Hari 6:1, atong mabasa nga kini nahitabo sa ika upat ka gatus ug otsenta (480) katuig human ang mga anak sa Israel migawas gikan sa yuta sa Egipto, sa ika upat (4) katuig nga paghari ni Solomon ibabaw sa Israel. Sa laing bahin, sa Buhat 13:18, si apostol Pablo nagatug-an kanato nga sulod sakwarenta (40) katuig nga ang Dios nagpahimutang sa Israel didto sa kamingawan. Unya sa Buhat 13:19, 20, adunay panahon nga upat ka gatus ug singkwenta (450) katuig hangtud kang Samuel nga propeta. Si Saulo ug David naghari matag-usa kanila sakwarenta (40) katuig (Buhat 13:21, 2 Samuel 5:4). Kining tanan dili muhaum sa upat ka gatus ug otsenta (480) ka mga katuigan sa 1 Hari 6:1. Unsaon nato pagpatin-aw kini nga kalainan? Sulod sa upat ka gatus ug singkwenta (450) katuig hangtud kang Samuel nga propeta, ang Israel nag-alagad sa ubang kanasuran kay sa Dios. Ug tungod niana ang upat ka gatus ug otsenta (480) ka mga katuigan sa 1 Hari 6:1, wala mag-apil sa mga tuig nga ang Israel wala kahimut-i sa Dios.



Tinubdan: Sweet Publishing – kini ilustrasyon lamang sa 1 Hari 3:26

Ang Templo nagalangkob sa balay ni Jehova (1 Hari 6:2), sa pultahan sa atubangan niini (1 Hari 6:3), sulod nga sawang (1 Hari 6:36), o sawang sa mga sacerdote ug ang dakung sawang (2 Cronicas 4:9) diin ang mga tawo magatigum aron sa pagsimba. Ang balay alang ni Jehova adunay labing sulod nga balaang puloy-anan, ang Balaan sa Tanang Balaan, diin ang arka sa tugon ni Jehova gipahimutang (1 Hari 6:19).

Ang unang halaran mao ang Halaran sa mga Halad-Sinunog, gitawag usab kini nga Halaran nga Tumbaga. Kini gipatindog sa atubangan sa balay ni Jehova (2 Har 16:14) ug sa ibabaw niini ang mga hayop ug mga langgam gihalad. Ang dugo sa halad ginasalibay ngadto sa patukoranan sa halaran. Ang hayop nga igahalad kinahanglan labing maayo. Ang magahalad magapatong sa iyang kamot sa hayop, pagpaila sa iyang sala niini. Sa diha nga ang hayop pagapatyon na (pinaagi sa mga kamot sa magahalad) kini namatay alang sa mga sala sa nagahalad. Dili kini halad alang sa gihinganlan nga mga sala sa nagahalad (kay kini ginaapil na sa ubang mga halad), apan sa kinatibuk-an nga kahimtang sa pagkamasal-anon.

Ang ikaduhang halaran mao ang Halaran sa Incenso, nga gitawag nga Halaran nga Bulawan ug gipabarug sa sulod sa balay ni Jehova.

Sa 2 Cronicas 5, 6, atong mabasa ang tanang mga gibuhat ni Solomon alang sa balay ni Jehova nga nahuman ug sa unsa nga paagi nga kini gipahinungod. Nakita ni Solomon nga sa umalabut nga mga adlaw ang panahon sa kagubot muabut, ug siya nagaampo nga ang Dios magapatalinghug sa Israel ug magatabang kanila sa maong panahon. Human niini, adunay kalayo miabut gikan sa langit ug misunog sa mga halad-sinunog ug mga halad, ug ang himaya ni Jehova nakapuno sa balay. Ang tanang mga anak sa Israel, sa ilang pagkakita sa kalayo nga miabut ug ang himaya ni Jehova nagapuno sa balay, mingduko sa ilang kaugalingon uban sa ilang mga nawong paingon sa yuta ibabaw sa binaldosahang salug, ug misimba sila ug nagahatag pagdalayeg kang Jehova, 2 Cronicas 7:1-3.

Nahinumduman pa ba nimo ang atong gihisgutan nga *simbolo* diha sa Bibliya? Usa kini ka tawo o butang nga naghulagway daan. Ang gingharian ni Solomon usa ka hulagway sa daku nga GINGHARIAN SA LANGIT dinhi sa kalibutan. Ang Dios nagasaad ug gingharian kang Abraham, Isaac, Jacob ug kang David, usa ka gingharian nga molungtad sa kahangturan. Sa atong mapa kini girepresentahan sa BALAANG BUKID SA GINGHARIAN, ug kini natukod lagmit sa dapit diin gitukod ni Solomon ang templo.

Si Solomon hulagway sa atong Ginoong Jesu-Cristo sa dihang magahari na Siya ingon nga Hari sa tanang mga hari (Pinadayag 19:16), ug ang mga kanasuran muabut ug mosimba Kaniya, Pinadayag 15:4. Nahibulong ka ba asa kita, mga magtotoo ni Cristo, nianang mga panahona? Atong tan-awon ang TUGPAHANAN SA GRASYA diin ang tanan kinsa misalig sa Ginoong Jesu-Cristo ingon nga ilang kaugalingong Manluluwas nahimong mga pasahero sakay sa SAKYANAN SA KALUWASAN.

Sa dili pa Siya moanhi aron sa paghari dinhi sa kalibutan, kita, ang sakop sa Lawas ni Cristo (1 Corinto 12:27) pagasakgawon aron sa pagsugat sa Ginoo diha sa kahanginan, aron makig-uban na Kaniya sa kahangturan, 1 Tesalonica 4:17. Samtang kita, mga magtotoo kang Cristo, nagahulat sa paglalin gusto Niya nga kita mahimong mga *Tinugyanan* nga pinadala alang Kaniya. Kita nagahangyo sa uban sa ngalan ni Cristo nga magpasig-uli sila sa Dios. Ug magasalig sa Ginoong Jesu-Cristo ingon nga ilang kaugalingong Manluluwas gikan sa impiyerno, 2 Corinto 5:20-6:2.

Ato nang nakita ang himaya nga miabut ngadto kang Solomon tungod kay mituman siya sa Dios. Sa sunod nga patulon-an, atong tan-awon ang kadaut sa dihang si Solomon misupak. Usa ka makahingangha nga paglaum nga kita pagasakgawon aron pagsugat sa Ginoo diha sa kahanginan. Apan tingali wala pa nimo kini maangkon nga paglaum. Dili lisud nga mahimo ka nga anak sa Dios. Saligi Siya ingon nga imong kaugalingong Manluluwas gikan sa impiyerno pinaagi sa pagtoo nga Siya namatay, gilubong ug nabanhaw alang kanimo, nga gidala ang imong sala diha sa Iyang kaugalingon. Unya mahimo kang anak sa Dios ug isigkamanunod uban kang Cristo, Roma 8:16,17.

SAG-ULOHON NGA BERSIKULO: “Ug kon kita mga anak, nan, mga manununod diay kita, mga manununod sa Dios ug mga isigkamanunod uban kang Cristo, kon moantus man kita uban Kaniya aron pagahimayaon usab kita uban Kaniya.” Roma 8:17.

PAGTULON-AN 15 – BULOHATON

Direksyon: Isulat ang hustong tubag sa mga pamahayag o pangutana.

1. Ang Dios midumili kang David nga motukod sa Templo tungod kay _____
_____. 1 Cronicas 22:8.
2. Ang Dios miingon nga ang anak ni David nga si _____ mao ang
magatukod niini. 1 Cronicas 22:9,10.
3. Ang Dios naga-ingon nga ang trono sa gingharian ni Solomon Iyang lig-onon
_____. 1 Cronicas 22:10.
4. Si Solomon nangayo sa Dios nga hatagan siya sa _____.
2 Cronicas 1:10.
5. Ang Dios mipakita nga Siya nahimuot sa mga halad ug pag-ampo ni Solomon pinaagi
sa pagpadala ug _____. 2 Cronicas 7:1.
6. Ang Dios misulti ni Solomon: Kon ikaw motipas ug biyaan ang Akong mga
kabelaoranan ug Akong mga sugo nga Akong gihatag kaninyo _____
_____; nan _____
_____. 2 Cronicas 7:19,20.
7. Ang gingharian ni Solomon usa ka tipo/hulagway sa dakung panahon nga muabut sa
diha nga si Cristo magahari sulod sa usa ka libo (1,000) katuig ug ang kalibutan
mapuno sa _____.
Isaiah 11:9.
8. Kon kita, mga membro sa Lawas ni Cristo, moantus, _____
_____. 2 Timoteo 2:12.
9. Samtang kita magapaabut nga pagasakgawon aron makig-uban ni Cristo sa walay
katapusan, gusto sa Dios nga kita mahimong mga _____ kang Cristo.
2 Corinto 5:20.
10. Isulat ang Roma 8:17: _____

